

元亨釋書

サツルサニ

サツル

特別
八4
5587
12





元亨釋書卷第二十一

濟北沙門

師鍊



資治表二

起孝德至元
明合七君

孝德皇帝

第三十七

敏達曾孫弟淳王子也

元年春正月建元大化。夏四月秋七月冬十月

元年丙午正月不書即位去歲六月于難
彼宮也。帝皇極之弟舊史繫元於乙巳曷

為今立丙午春秋之法一年不二君踰年
即位踰年立元法干春秋也舊史去七月
書建元今改正月蓋春秋之意也此歲當
貞觀二十年也

二年

三年春二月遣求法沙門干三韓夏秋冬

三年二月求法比丘入干三韓曷為不入

唐而入三韓三韓者我藩也

四年春蘇公建山田寺三月誅宰臣蘇氏夏

秋冬

四年三月僕射蘇麻呂遭讒居百川宅官

使帥師圍宅蘇公有季子二人為比丘於

是乎將二比丘走先是使長子興志營山

田寺聞父事馳迎塗興志曰家屬可用乞

拜官軍蘇公語山田寺眾及興志曰夫為

人臣者毋搆逆於君我奚捍官師乎且今

汝創此寺者不為門闕祝天祚也今我見

譖及干此也古賢皆爾也我何恨焉我不

失愚忠于地下而已矣。然來此者以死盟
佛也。言已入殿誓曰：願我來世不負債於
君也。擔已自經而死。妻子自殉者八人。積
公雖遭讒不失忠。故書曰：宰臣而受官誅。
故書氏。

五年春二月甲申改元白雉。夏六月仙人
道入宮。秋冬十月繡丈六佛像。造一千佛像。
五年二月長列亢戶獻白雉。宣問百濟君
對曰：後漢明帝永平十一年或獻白雉。今

當聖代瑞禽出焉。為吉徵耳。又問諸沙門
僧是法師奏曰：是休祥也。伏聞王者德流
四表則白雉見。又王者祭祀不相踰宴食
衣服有節則白雉至。又周成王時越裳氏
獻白雉曰：國之黃耆。子曰：無暴風淫雨。江
海不波。溢者三年於茲矣。意中國有聖人
乎。盍往朝乎。故重三譯而至。又晉武帝咸
寧元年白雉見。松滋是等瑞應多。載簡冊
自非階下仁聖。何及於此。乞放干禁苑。亦

赦天下因此十五改元六月法道之事在
本傳十月創丈六繡像及八部等四十六
像又詔漢山口真木口刻千佛像
六年春三月慶繡像夏秋冬十有二月二千
沙門轉大藏千宮中夜然二千燈
六年三月皇祖母延十師設齋慶繡像十
二月二千讀經及然燈者依法道之化也
七年春夏四月釋慧隱慧資講論宮中秋冬
十有二月大集僧尼千宮中齋

七年四月詔慧隱於宮中講無量壽經命
慧資為問難一千沙門豫聽十二月普會
天下僧尼千宮中設齋此夕燒燈依法道
化也

八年春夏五月沙門道昭定慧等赴唐天皇
幸沙門僧旻房六月贈僧旻秋冬

八年五月遣唐大使小山長丹發于京求
法沙門道嚴道通道光慧施覺勝辦正慧
照僧忍知聰道昭定慧安達道觀等從之

副使小乙上掃守連沙門之從者道福義
向也。是法師病，帝幸房間之，口救息命。六
月，夏師卒，帝嗟悼，遣中使弔之，并賜賻。皇
祖母皇太子弔法師喪。

九年春，夏秋冬十月壬子，天皇崩，謚孝德。
九年十月之崩，初十也。

△齊明皇帝

第三十八女帝 皇極重祚

元年春正月甲戌，天皇復位。夏四月，秋七月
冬十月，建川原寺。

元年乙卯正月初三，皇極帝復位于板蓋
宮。冬，遷飛鳥川原宮。故營川原寺。是歲當
高宗永徽六年也。

二年春，夏秋冬比丘尼法明講維摩詰經。
二年內，臣鎌子連疾，帝憂之。百濟尼法明
奏曰：維摩詰經因問疾說大法，乞試誦之。
敕明誦未終，卷疾愈。鎌子感伏，帝大悅。

三年春，夏秋七月，設孟蘭盆會。作須彌山，于
飛鳥寺西。冬十月，內臣鎌子建山階寺，修維

摩會

維摩會始

三年十月鑊子於山州陶原家創山階精舍設維摩齋會維摩會自此始

四年春夏秋七月沙門智通智達赴唐冬沙門福亮講維摩經于陶原家

四年七月通達二師奉敕乘新羅舩入唐受相宗於玄奘三藏是歲吳僧元興寺福亮赴鑊子請於陶原家講維摩經爾來鑊子延海內碩德相次講演凡十二年

五年春三月造須彌山于甘檮丘東夏秋七月講孟蘭盆經于諸寺冬

五年七月詔羣臣於都下諸寺勸講孟蘭盆經報七世父母

六年春三月講仁王護國經于官中夏五月設仁王會秋冬

六年五月造百座百袈裟賜一百沙門設仁王會

七年春夏五月癸卯遷都于築紫朝倉秋七

月丁巳天皇崩謚承明冬

七年五月初九都築紫之朝倉造宮于廣庭七月之崩二十四也

△天智皇帝 第二十九

元年春三月救高麗夏四月秋七月冬十月元年壬戌正月不書即位素服稱制也帝舒明第二子自築反在長津宮二月唐人新羅人伐高麗高麗乞救于我四月鼠產于宮馬尾沙門道顯曰高麗屬我乎果然

君子曰博乎顯也學涉于藝術也是歲當龍朔二年也

二年

三年

四年春三月度三百三十人夏秋冬

四年二月間人大后崩三月三百三十之度薦后也

五年春夏秋冬唐沙門智由獻指南車

六年春三月巳卯遷都于近州志賀夏秋冬

六年三月十九自和州遷近州志賀大津宮

七年春正月戊子天皇即位建建福寺夏秋冬營殿于百濟大寺天女降殿新羅道行擬草薙劍

七年正月初三帝即位曷為緩孝也帝創建福寺于志賀都當平基趾得寶鐸長五尺五寸又得白石長五寸夜有光帝喜奇瑞斬左手無名指納殿前燈幢石壇中是

歲新百濟寺又營別殿安丈六釋迦像莊飾極人工帝一夜持誦像前謂左右曰朕以淨信嚴像設弗知真容肖不五更二天女降容兒端麗衣服光耀香氣甚烈禮像了白帝曰我昔靈山親覲真儀今見此像毫無差迤此土王臣可謂清信言已飄然入雲帝大悅慶讚曰紫雲下覆天樂遙鳴昔素戔嗚尊謫雲州有老公媪中坐少女而泣女甚美素尊問何為哭對曰我有八

兒其七已為蛇吞今此一女又無由脫故
哭素尊曰與汝於我可解此愁父母喜曰
諾素尊問曰其蛇何形對曰八首八尾其
可怖也素尊乃設八槽盛以醞酒裝女置
山頂其影沉八槽大蛇見之以為真女便
矯八頭飲八槽已而醞醉不寤素尊拔所
佩十握劍斬蛇至一尾刃少缺割而見之
有寶劍素尊奉劍於天照太神太神曰我
屏天巖時落此劍于近州伊布貴山是我

神劍也太神命其孫瓊杵尊降此國付三
神器為國鎮劍其一也累世為國寶至崇
神皇帝恐劍靈威召良治模打獻舊劍于
伊勢太神宮新劍留王宮景行之世東夷
叛帝以皇子日本武尊為元帥征夷武尊
承認東征先詣伊勢太神宮太神賜此劍
赴東武尊佩劍至駿州浮嶋原諸夷謀曰
皇子雄略勇健非我等所伺當設奇計乃
白言皇子神威夷族不敢拒命此地宜游

獺皇子虞遊可乎武尊諾已而夷賊縱火
于時初冬窮野枯草煙焰迅飛武尊拔劍
揮之四旁一里草木芟夷其火自止初蛇
帶此劍其尾常有雲氣故曰天叢雲劍至
此名草薙劍武尊自東歸還劍於勢官其
後以劍藏尾州熱田神祠新羅沙門道行
聞劍靈欲之乃入神祠持誦一百日竊取
劍裏僧伽梨携至築紫赴本邦忽海風暴
起彼怒船數不得去凡行取劍三回皆不

得始持誦七日取劍而出俄黑雲一帶自
空下奪劍送到神祠行益欽劍靈又持誦
五十日取劍至近州蒲生郡黑雲下奪如
先至此持念百日遠至築紫而遂不得曷
為不族道行盜也既是盜曷為不曰盜沙
門也擬何不得之謂也

八年春夏秋冬十月大織冠藤鎌足薨

八年十月大織冠病革先薨數日剃髮帝
賜黃金香爐曰已聞出家可持法具薨後

詔百僚赴喪事

九年

十年春夏秋冬十月慶一百佛像于宮中獻法衣金鉢香財于法興寺像太子薙髮入吉野山十有一月沙門道旻至自唐十有二月乙巳天皇崩謚天智

十年十月帝不豫刻百佛像慶讚宮中又以袈裟金鉢象牙沉水旃檀香及諸珍寶供法興寺佛像帝病篤詔太子大海曰朕

病彌留汝其登皇位對曰臣元多病難任社稷請禪位于太后令大友太師攝政臣願為陛下出家修道便薙髮于宮中為沙門遂入吉野山公卿百僚皆送焉十一月唐使郭務悰來道旻從之歸十二月之崩初三也

△天武皇帝

第四十

天智弟天武帝是也

元年春正月夏四月秋七月冬十月

元年壬申帝在吉野宮大友皇子令以營

山陵聚兵謀帝因茲帝幸勢州發師相拒
七月戰近州瀨田大友軍敗自縊九月帝
移和州崗本官今茲亂離無遷都儀帝天
智之弟是歲當咸亨三年也

二年春二月癸未天皇即位沙門智藏為僧
正夏秋冬十有二月紀訶多為造寺司

二年二月二十七帝即位救於川原寺寫
大藏經沙門智藏督役故任僧正十二月
小錦紀訶多為造高市大官寺司時知事

福林告老解職不聽焉戊申以義成為僧
都加佐官二比丘有四佐官自此始不書
微也此歲慧師慧輪智圓皆為僧正不書
古史失時日也

三年

四年春三月沙門智通為僧正夏四月設齋
會于宮中秋冬十月求大藏經

四年四月宮中設齋會延僧尼二千四百
人十月遣使於四方求一切經文曷為求

支那大藏
備足者本
宋之朝也
此時代當
高宗之代
宣武李朝
元藏經

是時大藏未備也王者無求曷爲書求彼俗也以俗而言善此真也以真而求益善五年春夏旱秋冬十有一月講寂勝仁王二經于諸州

五年復旱詔僧尼法雲尋常書寧不書旱曷爲書旱不書寧不應也不書寧而書旱令君子思焉

六年春復秋八月轉大藏于飛鳥寺天皇幸之大度入冬

六年八月設齋會于飛鳥寺讀大藏帝幸南門禮佛詔諸王公卿各賜度者一人因此貴族之中薙髮之者多矣

七年

八年春三月施僧尼夏四月定宮寺秋冬十月定僧尼服色駕從聽僧尼老病醫寓

八年三月施綿帛於僧尼加減有差揀貧乏也四月檢校諸寺封食而置官寺十月詔曰凡諸僧尼常住寺院勤于修練然老

病之者不便省養自今以降許就親知薦
信之宅醫育

九年春復四月禁小寺官治五月講金光明
經于宮中秋七月使皇子弔沙門弘聰喪冬
十月施僧尼十有一月建藥師寺后病愈使
皇子問沙門慧妙疾又弔之度一百人天皇
疾老

九年四月禁小寺官治止繫掠也而大寺
之係官如飛鳥寺不在此列也故書曰小

寺蓋有司或因保官寺連掠小寺也五月
施布帛京內二十四寺讀金光明經于宮
中設講席七月癸巳飛鳥寺弘聰卒使大
津高市二皇子弔之十月施京寺僧尼惠
貧乏也及京師百姓耆老等各有卷十一
月皇后病創藥師寺度一百人祈疾而愈
初有司不委寺規沙門祚蓮入定見龍宮
出圖而奏介後持統文武二帝繼營壯麗
妙絕丁亥沙門慧妙疾使草壁皇子問之

戊子率使三皇子弔之

十年春復秋七月皇后設齋會冬

十年閏七月皇后於京內諸寺設齋講經
閏在于七而書正者春秋之法也

十有一年春夏秋八月度一百四十人冬

十一年八月高公主病度百四十人于大

官寺祈愈

十有二年春夏四月宮中異處居僧尼度三

十人秋八月詔釋道寧法寧冬新大宮大寺

十二年詔僧尼居宮中擇淨信者三十人

出家八月旱百濟道寧法寧得雨祈而有

應故書姓尊之也是歲遷百濟寺于高市

郡改曰大官大寺今之大安寺也

十有三年春夏四月設齋于宮中福揚下獄

秋冬天皇不豫皇太子祈大官寺愈

十三年四月飛鳥寺沙門福揚下獄庚戌

自刎而死冬帝病太子草壁奉救率百僚

詣大官大寺誓曰皇帝欲開會於寺而營

搆未畢聖體不豫伏丐大悲世尊延眷
成寺會帝感靈夢病痊

十有四年春三月許天下民宅搆佛宇夏四
月宮中異處安居僧尼五月天皇幸飛鳥寺
沙門觀常雲觀至自新羅秋八月天皇幸淨
土寺千川原寺九月轉佛經于三大寺冬十
月沙門常暉賜封戶講金剛般若經于宮中
十有二月施綿帛于大官寺

十四年三月詔諸州家搆佛舍安像經供

養崇奉四月宮中安居自此始五月幸飛
鳥寺獻珍寶禮佛辛未新羅留學常觀二
比丘從國使歸八月幸川原寺施稻於衆
僧九月帝疾於大官川原飛鳥三寺三日
轉經賜稻于三寺祈病也十月百濟沙門
常暉年一百歲受封三十戶養老也

十有五年春正月俗供供九沙門夏五月納
封戶于大官寺講藥師經于川原寺沙門安
居宮中修廢寺六月伊勢王入飛鳥寺燈齋

鷄鵠來魯國
臧文仲以為海
鳥之來是祥
瑞也則調養
膳餉之并養
伎樂祭多居
飽養膳倦樂
音歷三日而死

千川原寺沙門法忍義照賜封戶秋七月延
沙門懺悔轉金光明經于宮中戊午改元朱
鳥九月丙午天皇崩謚天武冬十月放行心
干飛州十有二月設無遮會于五寺

十五年正月召三綱及大官寺知事佐官
并九比丘以俗供供之施布帛各有差非
禮也君子曰以鳥養鳥古之鑒乎三月羽
甲真人病度三僧祈病不書微也五月帝
病於川原寺講藥師經又召沙門安居官

中又詔修諸寺廢大赦天下園園已空皆
祈疾也六月使伊勢王詣飛鳥寺告眾祈
疾此日三綱律師及四方和尚知事現師
位等冬賜御衣被祈病也忍照二比丘賜
封戶各三十養老也七月召僧正僧都赴
宮為帝悔過一百比丘讀金光明經于宮
中祈病也和州獻赤雉因茲改元九月之
崩初九也十月大津皇子反新羅沙門行
心參謀事覺不忍加誅比丘竄于飛驒伽

藍十二月設無遮會于大官飛鳥川原小
墾田坂由五寺薦大行皇帝

△持統皇帝

第四十一諱免野高天原廣野姬
天武帝后也

元年春正月夏四月秋八月施伽梨于三百
沙門九月設國忌齋于京師諸寺沙門智隆
至自新羅冬十

元年丁亥正月不書即位攝也帝天智第
二女天武之后居后位稱制在藤原城八
月以先皇御衣製三百袈裟施三百沙門

智隆之歸附使也是歲當武后垂拱二年
也

二年春正月設無遮會于藥師寺二月乙巳
置國忌齋夏秋七月釋道藏法事冬新羅王
子金霜林獻佛像及珍寶

二年二月詔曰每逢國忌設齋立為式七
月詔百濟道藏祈雨不崇朝雨天下故書
以氏是歲新羅金霜林獻佛像書以王子
貴之也

三年春正月蝦夷鐵折為沙門賜蝦夷沙門
道信干佛像復四月還新羅獻像沙門明聰
觀智至自新羅六月賜明聰觀智干布帛秋
七月賜蝦夷沙門自得于新羅像八月置放
生所冬

三年正月蝦夷鐵折等奏乞為沙門許之
書名貴之也春秋之法不名為貴蝦夷曷
為書名為貴公卿有官氏書名為賤蝦夷
無官書名為貴至戊賜佛像鉢幡保惠也

新羅以錢禮
雖責之彼異
域人而未朝久
資糧既盡以
恩惠雜施布
帛賜罪人者
非禮故三正立
營

四月新羅王弔先皇喪獻彌陀觀音勢至
三銅像及珍物於是召新羅使責其緩而
違禮也乃以獻物還之新羅使大懼求法
聰智等從新羅使而歸新羅使乞救於聰
智二比丘奏怒六月詔大宰府賜布帛于
二比丘而勞新羅使君子曰有威有息有
礼乎因此留新羅獻物適蝦夷自得奏乞
新羅像詔而賜之八月置放生所三攝洲
武庫海一千步紀州耆野賀州身野各二

萬頃順佛化也

四年春正月戊寅天皇即位二月新羅沙門
詮吉來夏五月庚寅置安居講于宮中秋七
月賜施布帛于安居沙門八月沙門智宗義
德淨願至自唐冬

四年帝后位稱制謙不即真羣臣固請正
月一日即位百僚賀拜七月施七寺安居
比丘都計三千三百六十三人又施三寺
安居沙門三百二十九人薦皇太子也賜

施何二事也何如二賜賞也施薦也曷為
不別書安居同八月留唐二沙門從新羅
使而歸

五年春二月諭百僚奉佛夏六月轉經于京
畿諸寺秋冬

五年二月詔曰朕思先皇時公卿百僚各
營佛宇亦月修六齋故先皇時時遣使慰
問近來不知不替乎朕之不詢甚愧于哀
而又曷不聞乎自今卿等願令朕世如先

代六月詔曰茲復靈悲傷稼朕女主教不明故及於此也將又卿等令之邁乎朕以惕乾乾思補厥愆卿等庶省宴樂酒肉有意於此乎其宣京寺沙門誦讀五日禪朕不逮焉

六年春二月法藏道基受銀夏五月講金光明經于京畿觀成受綿帛傳佛教于大隅阿多秋冬

六年三月三帝幸伊勢神宮預令百僚嚴

觀成初傳造鉉粉也法故受此賜也

行裝沙門法藏道基以才為陰陽博士故賜銀備負仕官非法也故不書族莊服非法也故書受觀成之受帛造鉉粉也工作非法也除族書受西州大隅極西僻區民未聞真化詔大宰府帥河內王遣沙門像經傳唱佛法

七年春正月賜沙門法鏡田三月賜沙門辨通神睿布帛五月設無遮會于宮中秋九月設無遮會于宮中冠福喜冬十月己卯置

仁王寂勝講于宮中十有一月沙門法真等
嘗醴泉

七年三月通睿二比丘赴新羅詔賜布帛
九月無遮會薦先皇也高麗沙門福喜以
才詔反俗十月宮中仁王寂勝二經講立
為式十一月近州益須郡醴泉出刺史奏
之救法負善往真義等試嘗

八年春復四月聘沙門道光五月頒金光明
經于天下秋八月度一百人冬

八年四月沙門道光卒詔賜錢帛供喪事
五月以金光明經一百部頒諸州每年正
月上絃轉之祝聖各當列祖充僧觀八月
百度薦飛鳥公主也

九年

十年春夏秋冬十有一月沙門辨通賜封戶
十年十一月通師之封四十戶也

十有一年春三月設無遮會于春宮夏六月
法雲于京畿諸寺遣官僚掃京寺百僚造佛

像秋七月設佛眼會于藥師寺八月乙丑天皇禪位于皇太子後謚持統冬

十一年六月遣官僚五品以上掃灑京寺見崇敬也帝不豫百官刻佛像祈焉七月像成於藥師寺設佛眼會八月之讓位初一也

△文武皇帝 第四十二

元年春三月沙門慧施為僧正善往為律師夏四月秋七月冬十月藥師寺成十有一月

沙門道眼為大僧都

元年戊戌正月不書即位去歲八月初一于藤原宮也帝天武之孫草壁太子第二子母元明帝也舊史丁酉紀元今立戊戌者孝德之例也律師何僧官也往始任雖微書十月藥師寺落成詔諸沙門居大僧都自眼始故書凡始者雖微書是歲當聖曆元年也

二年春夏五月竄役小角于伊豆嶋六月起

善往始任律師

塔于大官寺度五百人懸鏡慶佛秋冬
 二年五月後君貶丑嶋朝散大夫韓國連
 師事小角已而嫉其能讒以妖惑故有此
 配謫臣曷為書姓不罪也初天智帝誓造
 丈六佛像而崩帝欲成先志而不得良工
 一日幸大官寺合掌誓曰安得良匠摸刻
 聖容其夜帝夢一沙彌白言往歲造此像
 者化人也不可重來又夫良工猶有雕刻
 之誤名畫不免丹青之訛不如以大鏡懸

見形
 鏡中之
 像非有
 形現今有
 形像故以
 喻之心身
 也
 窺其影
 報身
 相也報身
 相者法
 身之影也
 觀之空
 鏡中
 像非出
 形故歸
 空之即
 是此身
 之第也

佛前拜其映像像者非圖非刻三身自具
 何者見其形者應身之體也窺其影者報
 身之相也觀其空者法身之理也功德勝
 利莫大焉帝覺後知如來之感現即懸大
 鏡于佛前作禮延五百沙門設供養
 三年春三月弔沙門道昭夏秋冬冠通德慧
 俊

三年三月道昭法師寂帝嗟悼遣中使弔
 慰是歲救德俊二比丘反俗以其才任朝

通德慧俊二比丘
 奉詔反俗

事也乃度二人貸之

四年春正月赦役小角二月沙門道慈赴唐
三月甲午改元大寶復秋八月冠慧耀冬

慧耀信成二正
以文還俗

大寶元年三月對州貢金因茲改元是歲
慧耀信成反俗才任也度者貸之

五年春正月沙門智淵為僧正夏秋冬十有
二月度一百人

大寶二年十二月百度祈持統上皇病也
六年春二月設齋于三十三寺三月沙門義

淵為僧正復秋冬十月冠隆觀沙門智鳳赴
唐

沙門隆觀
蒙勅反俗

大寶三年春太上皇七七忌設齋于四天
五山田等二十三寺沙門隆觀博涉藝術
尤善算曆十月赦反俗是歲沙門智鳳入
唐

七年春五月甲午改元慶雲秋冬
慶雲元年五月祥雲見西樓上初十因此
改元

食菜蔬者類
色大裏以奇
年之民食物
今而有飢面

八年春復四月轉金光明經于五大寺秋冬
慶雲二年四月詔曰朕以菲薄之躬託于
三公之上不能德感上天仁及黎庶遂令
陰陽錯謬水旱失時年穀不登民多菜色
每念於此惻怛於心宜令五大寺讀經救
民焉

九年于夏秋冬十月右僕射藤公屈沙門智
鳳為維摩講師
慶雲三年十月僕射不比等修維摩會一

七日始初十至十六蓋十六者大織冠諱
故充散日

十年春夏五月沙門義法義基集慈定淨
達至自新羅六月辛巳天皇崩謚文武秋冬
慶雲四年五月五師之歸從國使也六月
之崩十五也

元明皇帝 第四十三 名日本根子天津御代豊國成姬

元年春正月乙巳改元和銅契四月秋七月
冬十月定轉大般若經

和銅元年戊申正月不書即位去歲七月
十七也十六帝天智第四女武列十六秩父郡始貢
銅因茲十一改元十月詔曰自今年每歲
延沙門轉大般若經其齋親左右藏給之
定何式也十六是歲當中宗景龍二年也

二年春二月詔大宰府檢搆觀山音寺十六復秋
冬十月右僕射藤公修維摩會十六

和銅二年二月詔曰築紫觀世音寺者淡
海大津宮天皇薦後崗本宮天皇所創也十六

累世不竟朕痛耻焉大宰府加檢校速修
營十月藤公不比茅屈淨達法師於植觀
淨場修維摩會禮也此會中微藤公更修
貴之而書

三年春三月辛酉遷都于和州平城右僕射
藤公建興福寺十六復秋冬移大官大寺于平城
和銅三年三月從難彼遷都奈良藤公不
比茅營興福寺大殿禮也其像者大織冠
誅蘇入鹿時所誓刻之丈六釋迦及二菩

從難彼遷
都奈良

薩像也

四年

和銅四年

五年春夏秋冬十月修維摩會于興福寺

和銅五年十月於興福寺修維摩會先或陶原殖槻數所及興福之建移焉

六年春夏四月作諸寺田記秋冬

和銅六年四月敕作諸寺田記二通一藏有司一頒諸寺

七年春二月冠義法夏秋冬

沙門義法奉詔及管

和銅七年二月敕沙門義法反俗授朝散大夫用占術也

八年春夏秋九月庚辰天皇禪位于皇太子後送元明冬

和銅八年九月之禪位初三也

元亨釋書卷第二十一

大日本白延文庚子六月有 貞人皇尊太歲 玉成禮寺高居比丘單况謹 募眾緣恭為

今上皇帝祝延 聖壽文武官僚資崇 祿位國泰民安命工鑄梓與

大藏經印板共行一部計三十卷皆永和三年庚八月

日謹題

元亨釋書卷第二十二

濟北沙門 師鍊 撰

資治表三

起元正至廢
帝合四君

元正皇帝

第四十四文武妹 日本根子高瑞淨足姬 諱水高 平城宮居也 淡海本不比等大臣也

元年春正月改元靈龜夏五月復知事管寺

產移元興寺于左京秋八月沙門玄昉赴唐
冬十月

靈龜元年丙辰正月不書即位去歲九月初三于平城也帝革壁太子女母元明帝即位日左京北獻白龜因茲改元舊史系乙卯今立丙辰者孝德之例也五月初近州刺史藤武智適遊一寺殿宇荒頽不見比丘顧問村人對曰檀家管統寺產主事無分故有此廢不獨此刹餘處多爾刺史

頓頰曰如來設教其旨深妙天竺支那延及此方且失創寺檀信元志植福何其孫子不思先業侵三寶物致是朽荒不啻滯累其身於曠劫所以虧耗至治於清朝也乃表奏曰臣幸浴大化得守上邦適問民事至一精舍院宇頓毀緇伍不在問之知依檀家管寺供也若不下明詔起此廢恐滅正法且缺清化不獨當州餘方或聞乞下嚴救復此敗亡臣不敢專仰待明制詔

曰傳聞浮屠之法清淨無為纔有檀興辟
功不處是以射空之矢從空而落投海之
滴與海不竭今民間謾收冥海之波却受
墜空之矢是不啻貪墨之甚又弗耳真乘
之過也自今以往天下寺院田業資產悉
隨僧管不許檀家係掠若其資寡廢久之
院宇合數寺成一區衆僧諸檀共振頹綱
若有乖誑刺史檢校以聞是歲當元宗開
元四年也

二年春夏秋冬十有一月癸巳改元養老沙
門道慈至自唐

養老元年十一月美州醴泉出因此十一
改元慈公是歲自唐歸

醴泉者藥也藥善老者

三年春夏秋冬十月舉高德精學業沙門行
善至自高麗三歲善無畏來遊

養老二年十月尚書省劄曰告諸僧綱智
鑑冠時衆所推讓宜舉其人者又諸僧徒
各有所業或誦習或禪修皆守本業慎加

勵勤莫事浮遊倦墮矣行善之歸事在本
傳無畏不聞所止故書遊

四年春夏秋冬十有一月沙門神眷道慈賜
封戶

養老三年十一月眷慈二師之封各五十
戶

五年春正月與公驗于僧尼夏秋八月轉經
千四十八寺九月置放生會冬十有二月正
經師

八幡放生
會始

養老四年正月僧尼公驗始焉八月敕都
下四十八寺一日夜讀藥師經祈右僕射
藤公病也九月日隅二州亂朝廷祈宇佐
神宮乎寇大神託曰交鋒之間死傷多矣
我甚憐之願寇平之後置放生於諸州八
幡放生會自此始焉十二月詔曰真詮佛
乘化在音聞唱禮轉經元有規矩比來僧
尼或出私曲妄作別調後生之輩憤習成
俗若不變止恐壞聲教自今當式唐沙門

道榮及沙門勝曉轉唱餘皆停之
六年春夏五月詔天下合修廢寺度一百人
尚書右丞筮公薤髮六月優沙門行善錫道
藏秋冬

養老五年五月詔七道按察使巡州郡修
廢寺其不堪者合數寺太上皇病度淨信
男女一百人祈病也筮公出家書官者貴
之也六月詔曰沙門行善負笈萬里普事
游學既經七代博積修練天下所過之寺

院皆迎待供養又曰百濟沙門道藏釋家
棟梁法門領袖年逾八十氣力羸衰若無
束帛之施何寄恆老之志有司四時頒供
綿帛優錫何優遇稱譽也錫賜也賜錫孰
異賜常也錫非常也十二月太上皇崩
七年春夏秋冬十有一月寫諸經製幡蓋十
有二月設齋于京畿諸寺安彌勒像于藤原
宮

養老六年十一月敕寫華嚴大集涅槃大

菩薩藏經及觀世音經二百卷造幡蓋諸
法器薦大行大上皇也十二月於京畿諸
寺齋僧尼二千六百三十八人及藤原宮
安彌勒像者薦天武天皇也

八年春二月遣沙門滿誓檢搆觀世音寺
復秋冬建施藥悲田二院于興福寺

養老七年二月詔滿誓法師造觀世音寺
觀世音寺和銅二年詔大宰府官造已歷
十數年恐修也何書搆未竟也未竟書搆

無咎又警有司怠慢也若曰修未由見怠
滿誓誰笠右丞也是歲於興福寺建二院
納封戶五十及豫州田一千畝越州稍一
十二萬束

九年春二月甲午天皇禪位于皇太子後謚
元正夏秋冬

養老八年二月初四太子受禪

聖武皇帝 第四十五
字天瑞國押間豐樺彦命居平城
右四人御子男女四人吉備大臣此御代人

元年春正月改元神龜轉大般若經于宮中

夏四月諸州放生秋七月營殿干山階寺九月度入轉經冬十月

神龜元年乙巳正月不書即位去歲二月干平城也帝文武長子養老七年和州貢白龜第三十七因此即位改元舊史系甲子今立乙巳者孝德之例也延沙門六百人干宮中轉大般若攘災也夏天下放生及七月山階寺營殿安藥師像者祈太上皇病也九月壬寅詔曰朕聞古先哲王君臨寰宇順

災惑一
九耀內大
惡星也
時災或惡星
出大史白言
繫災于君
尤易以臣侯自不
也史曰以物
民侯曰不也
依此善言
惡星勿移
沒

兩儀以享毒叶四序而齊成陰陽和而風雨節災害除而休祥臻故能騰茂飛英鬱為稱首朕以冥薄嗣膺景圖戰戰兢兢夕惕若厲懼一物之失所瞻懷生之便安教命不明誠信無感天示象變地顯震搖熱惟災責責在予躬昔殷宗修德消雉雉之災宋景善言弭災感之異遙瞻前軌寧忘後德宜令有司擇三十人出家并左右京及和州管内諸寺始今月二十三一七日

之間轉經修勵憑茲勝利真攘災異此歲
當開元十三年也

二年

神龜二年

三年春二月僧尼轉金剛般若經于宮中夏
秋冬

神龜三年二月延比丘六百比丘尼三
百人讀金剛般若攘災也元年大般若不
書人今何書元年比丘而已言轉般若知
有比丘故不書今二衆并屈故書人三月

和州長谷寺成行基法師為導師義暹咒
願而慶之不書私也

四年春夏秋冬十月賻僧正義洲十有二月
頒金光明經于天下

神龜四年十月義洲法師卒賜布帛救禮
部監護喪事褒洲之德堂酬皇眷故書以
官十二月以金光明經六十四部頒下諸
州令比丘諷讀祝聖也

諸列者六十六列也而山和二列元未有
此經故除二列六十四部也

五年春二月設齋會于元興寺夏六月置修

仁王會于宮中止合廢寺秋八月癸亥改元
天平冬新大安大寺

天平元年二月於元興寺設大齋會龙僕
射長室皇子為監護時一沙彌連比丘座
捧鉢受飯僕射以牙笏擊沙彌頭血流下
面沙彌拭血而哭忽然不見經二日或奏
此事帝怒賜僕射死六月仁王會者一代
之會也立為式止合廢寺者辟濫井也左
京兆獻靈龜背有文曰天王貴乎智百年

因茲八月改元是歲修新大宮寺禮也初
有司不委寺規沙門道慈進西明寺面帝
大悅

六年春三月起東塔于藥師寺夏四月藤皇
后起塔于興福寺秋冬十月沙門辨正為僧
正

天平二年四月創興福寺塔藤皇右及僕
射房前率文武官僚曳材夷基
七年春夏秋八月度釋行基散徒冬

天平三年初行基法師善論導所至之處
耕夫舍鋤織婦投杼隨之而聽以故隨侍
之者多無賴情庸輩相憤持鉢寄活於我
八月詔曰行基法師從侍之士其中優婆
塞優婆夷如法精修者男年六十一女年
五十五以下咸許出家余持鉢行路之人
有司加檢捕

八年

天平四年

九年春復四月沙門榮睿普照赴唐秋七月

置玉蘭盆供于宮中冬

天平五年七月詔司膳寺備玉蘭盆供立
為式

調御膳司也

十年春正月藤皇后構西殿于興福寺夏秋
冬十有一月以妙法華最勝王經為度科

天平六年正月皇后光明子營西金堂平
興福寺安丈六釋迦佛及菩薩羅漢神王
等像施衲伽梨沙門四百人薦先妣橘氏
也十一月尚書省奏比來度者不考學修

只資官舉是非法意又亂聖政自今不許
舉度只取才器以妙法華寂勝王二經為
科先背誦屢問數義中者得第不中下第
制可

十有一年春夏四月沙門玄昉至自唐秋冬
十月定皇子薨薦唐沙門道璿來

天平七年四月昉師以傳來佛像及經論
獻于尚書省帝悅九月新田皇子薨十月
詔曰凡皇子之薨七七之忌供百比丘以

薦冥福立為式是歲唐道璿來救館大安
寺西唐院

十有二年春二月沙門玄昉賜封戶及田畝
扶翼童道慈扶翼童復秋七月度一百人冬
十月賜沙門道璿菩提時服

天平八年二月昉師賜封一百戶田一百
畝翼侍童八人慈師童六人也七月度一
百人都下四大寺行道一七日祈大上皇
病也十月璿提二師賜溫服

十有三年春二月營釋迦像大般若經于諸
州夏四月置轉經于大安寺五月轉大般若
經于官中秋八月轉大般若最勝王經于官
中度京師及諸州人沙門玄昉為僧正九月
施綿帛于京畿僧尼冬十月講最勝王經于
大極殿十有二月與玄昉縣帛

天平九年三月詔每州造丈六釋迦及菩
薩像并寫大般若經一部六百卷是國分
寺之權輿也四月沙門道慈奏大安寺修

造以來每歲命百五十比丘轉大般若以
故荐年災害消沮自今乞轉此經鎮國家
立為永式以官租為達觀制可五月朔日
有食之延沙門六百人宮中讀大般若經
攘災也八月於宮中一十五處轉大般若
最勝王二經京師度四百人諸州一百七
十八人祝聖攘災也九月兩京五畿比丘
比丘尼及沙彌二千三百七十六人賜綿
各有莞十月於大極殿講最勝王經百僚

皆集其儀同元日沙門道慈為講師堅藏
讀師皇太后藤官子染沉痾自誕帝未曾
相見十二月皇后光明子延玄昉法事帝
預聽此日藤官子在焉見昉師洗然病愈
遂與帝晤母子相喜百僚皆賀帝賜綿帛
絲布各一千純書曰與淫萌也昉師何不
書官氏蠱也

以蠱道媚藤官

十有四年春三月納封戶于山階寺干法隆
寺夏四月轉寂勝王經于天下秋七月納官

租于國分寺冬月六齋日停漁獵

天平十年三月朔日有食之納山階寺干
封一千戶法隆寺二百戶攘災也四月天
下之轉經祝聖也七月國分之租官稱各
二萬束也是歲詔曰去年天下諸州營寺
宇置像經今茲風雨順序五穀豐稔靈貺
如響佛事可崇自今天下諸州每月六齋
日不得漁獵殺生刺史加檢察

十有五年 天平十一年

十有六年春夏秋九月造觀世音像于諸州
冬十有二月丁卯遷都于山州恭仁鄉

天平十二年九月敕曰繁紫有不軌之臣
命軍討伐願依聖祐欲安百姓故今別
造大悲像高七尺不軌臣藤廣嗣也十二
月十五都山州山階恭仁宮

十有七年春正月頒封戶于國分寺三月舉
國分寺安四王像起塔寫頒經納戶田夏秋
冬十月橋役賜度

天平十三年正月藤太師遺命返封五千
戶帝割二千戶賜其家三千戶分納國分
寺充丈六像費也三月詔曰朕以薄德忝
膺大寶政化未洽寤寐省慙頃者年穀不
登慚懼交集是以博求景福覆燾兆庶去
歲令天下造釋迦佛像高一丈六尺及大
般若經數六百卷爾來風雨順序五穀豐
穰靈貺如響一懼一喜經云若有國土講
讀此經恭敬供養我等四王常來擁護故

今令天下諸州安四天王像及寫金光明
寂勝王妙法蓮華二經各一部朕又寫金
字金光明寂勝王經一部每列搆七級塔
安之所真聖法之感與天地而永流擁護
之恩被幽明而恒滿其造塔之所又國之
華必擇好處兼期久遠自今僧寺號金光明
四天王護國之寺撰明德二十人為居
者封五十戶田一百畝尼寺名法華滅罪
之寺擇淨尼一十人為居者田一百畝二

寺有缺量才補滿二寺各月八轉寂勝王
經望誦戒羯磨又六齋日諸州不得漁獵
刺史加檢校駕世山東河架橋始自七月
至十月募畿甸淨信民役之役竟得度凡
七百五人

十有八年

天平十四年

十有九年春正月轉寂勝王經于四十九寺
夏秋冬十月創大銅像千紫香樂

天平十五年正月帝作疏曰天皇敬諮四

十九座諸大德弟子階緣宿殖嗣膺寶命
思欲宣揚正法導御蒸民故以今年正月
十四日勸請出家之衆於所住四十九寺
限七七日轉大乘金光明寂勝王經仍令
天下七七日禁殺又於大養德國金光明
寺設殊勝之會為天下之模諸德等或一
時名輩或萬里嘉賓屈彼高明隨茲延請
諧慈悲之音暢微妙之旨仰願梵宇增威
皇家累慶國土安泰人民康樂同駕菩薩

遷平城於紫香
樂元梵又自紫
香樂殿于平城
大佛殿始于紫
樂故示云

之乘共登般若之岸三月遣右僕射橘諸
兄如諸寺慰衆僧十月於紫香樂京創毗
盧遮那佛銅像帝製幹䟽降尚書省宣示
天下曰有天下之富者朕也持天下之勢
者又朕也以此富勢成彼像設不為難矣
而已然亦少有思焉夫像者金銅一十六
丈之毗盧遮那佛也庇廕是像殿宇又宏
竭國銅而鑄傾國材而構度斯巨役也雖
寬租賦恐傷氓黎是以四海為費資萬姓

為助友一針一草各人各佛像成之日不
獨朕有以此勝利天下共之宜以朕意普
告天下帝闢寺基於是行基法師率徒并
勸士庶助役帝之大構元是良辯法師之
所勸也

二十年春二月庚申遷都于攝州難波三月
轉大般若經于新宮夏秋七月殖稻于國分
寺八月度三千八百人冬十有一月造大像
模

禮部云滋貨
曰殖也

天平十六年二月宣元僕射定難波都三
月於難波宮東西樓殿延沙門三百人轉
大般若經七月以稻二萬束賜國分寺子
母計畫收其贏充修造僧尼兩寺皆遍殖
何貨殖之謂也八月帝不豫自難波歸平
城度三千八百人病愈十一月於甲賀寺
創大像模帝親引繩太常奏樂救會四大
寺沙門達觀有羗焉

二十有一年春正月釋行基為大僧正復五

月間京復于四大寺沙門戊辰車駕復平城
秋八月移大像于平城九月度三千八百人
冬十有一月遣玄昉檢搆觀世音寺

大僧正官者
始於行基

天平十七年正月行基加大僧正及賜度
者四百人大僧正自基始五月遣膳部郎
栗栖王於平城藥師寺會四大寺衆宣問
三都何佳僉曰平城佳由是十一還李良
都八月於和州平城移營大像帝以衮袖
裹土築壇九月之度祈上疾也昉師在西

府有惡稱故書不氏官

二十有二年春夏六月玄昉天秋冬十月天
皇幸金鐘寺然燈

天平十八年六月觀世音寺成昉師慶之
忽空中捉昉不見其形後昉頭落興福寺
唐院初大宰府都督司馬藤原繼妻美昉
通花鳥使司馬慙自此與昉有郤十二年
司馬反大將軍野東人討之司馬亡而數
年矣其靈及於此也十月幸金鐘寺供盧

太宰大貳

郤者隙也

舍那佛然一萬五千七百燈沙門數千歌
唄讚頌繞佛三匝三更還宮

二十有三年春夏五月講仁王經于南苑及
天下秋冬十有一月納田千國分寺

天平十九年十一月勅國分寺塔婆僧坊
皆令修備因而納田僧寺九百畝尼寺四
百畝

二十有四年春夏秋七月寫法華一千部冬
十有二月度僧尼各一千

天平二十年七月千部法華薦大行元正
上皇也十二月一千之度薦山陵也

二十有五年春正月天皇受菩薩戒及皇太

后光月子大僧正行基錫牒大菩薩二月丁酉

釋行基寂奧州貢黃金夏五月納田戶財帛

于一十二寺秋七月甲午天皇禪位于皇太

子後謚聖武定諸寺莊田冬十月天子幸智

識寺十有二月天子及太上皇幸于東大寺

八幡大神入寺

天平二十一年正月帝於平城中嶋宮屈
行基受菩薩戒法諱勝滿皇后德滿皇太
后萬福即白賜號大菩薩書錫褒也二月
初帝鑄大像欲買黃金于唐國依字佐大
神託罷唐使至此與州刺史百濟王敬福
獻小田郡所出黃金九百兩敬福階銀青
光祿大夫閏五月納五千戶十萬畝于東
大寺又納稻帛于大安藥師元興興福東
大之寺墾田各一千畝及法隆四天王弘

福崇福香山建興法華之寺各若干畝帝
著發願文曰敬憑諸寺衆沙門大藏大小
經律論等轉讀講誦盡未來際永無退轉
故今以茲資產敬納諸寺所希諸佛菩薩
諸天善神隨喜擁護寶祚延長萬民樂業
法界有情成無上道七月初二太子即位
敕定諸寺莊田大安興福藥師法華諸國
分寺各一萬畝和州國分寺四萬畝元興
寺二萬畝弘福法隆四天王崇福新藥師

建興下野藥師築紫觀世音寺各五千畝
諸州法華寺各四千畝餘定額寺各一千
畝十月八幡大神託向京甲寅救諫議大
夫石川年足茅迎神赴路衛士百人所經
之州放生官使等不食酒肉道路除汗穢
十二月戊寅大神入都遣官使迎之於宮
南梨原宮造新殿棲神詔沙門四十輩慶
讚丁亥帝及上皇幸寺百僚皆從作種種
伎樂拜大像會五千沙門又納封四千戶

奴婢各一百人干寺此日八幡大神託社
女入寺拜像王臣大奇之尋常書大皇曷
爲言天子受禪之歲猶屬舊主天子之稱
理之順矣

○孝謙皇帝

第四十六聖武女母光明子高野姬又法皇

元年春正月改元天平勝寶二月納封戶于
金光明寺夏四月秋七月冬十月
天平勝寶元年庚寅正月不書即位去歲
七月初二也帝聖武之女母光明后去歲

與列貢金四月丁未改元天平感寶迄帝
即位換勝寶舊史系已巳今立庚寅孝德
之例也二月和之金光明寺封三千戶通
前成五千是歲當天寶九年也

二年春夏四月沙門菩提為僧正秋冬十月
修續命法千藥師寺

勝寶二年四月菩提法師為僧正世曰婆
羅門僧正十月敕沙門四十九人於新藥
師寺行續命法祈上皇疾也

三年春正月放生天下度一千人夏四月慶
東大寺天皇太上皇幸之秋冬

勝寶三年正月詔曰今年自孟春至窮臘
天下停殺生沿海之民以漁為活者數戶
給米已巳之度男九百五十人女五十人
祈上皇疾也四月初九慶東大寺上上皇
幸寺百僚皆從儀服甚盛講師隆重讀師
延福延一萬沙門奏一萬伎樂東西分列
歌舞交發佛法西來齋會之盛未嘗有也

四年春正月點燈于東大寺。夏秋冬

勝寶四年正月帝幸東大寺點二萬燈

五年春正月唐沙門鑒真來夏四月築戒壇

于東大寺傳林邑舞秋冬

勝寶五年正月鑒真法師從遣唐使伴胡

來真善律學四月救於東大寺建戒壇上

皇登壇受菩薩戒靈福等舊僧八十人重

受沙門佛指解音今茲詔樂部學林邑舞

所謂菩薩舞拔頭舞也

點二萬燈

六年

勝寶六年

七年春二月天皇幸智識寺南宮兵部尚書

橘建世設傳法會于志賀寺夏五月乙卯聖

武太上皇崩六月賜米鹽于沙門鑑真法榮

放生天下設僧齋于大安寺于興福寺促營

東大寺步廊秋冬十有二月六十沙門講梵

網經

勝寶七年二月上幸智識宮翌日禮隣寺

七佛五月初二聖武上皇崩沙門法榮誓

步廊

侍山陵轉經修薦救蠲榮本貫一郡租六月以上皇御膳米鹽茅賜真榮二師庚寅詔曰居喪之禮臣子惟同天下之民誰不預者天下諸列自今以去放生一期薦上皇也丙戌設一千僧齋于大安寺薦上皇五七忌也興福寺齋者七七忌也凡講供有儀曰齋會諷供不儀曰僧齋甲辰詔曰明年國忌當設東大寺步廊未竟速促營備諫六路諸州管租庸十二月遣名臣六

負千六大寺屈六十二沙門講梵網經薦太上皇也

八年春正月度八百人夏五月設僧齋于東大寺結安居秋八月丙寅行布薩于諸寺冬十有一月納田于東大寺十有二月納田于山階寺納封戶于法華寺

勝寶八年五月東大寺一千五百僧齋薦國忌也今茲國忌預始四月十五至五月二天下寺院講梵網經故安居在望八月

下書卷者
在五月望
今茲陽中
年

詔曰軌持佛法無尚木又戶羅之制協我
禮經自今諸寺勤行布薩因而每寺納田
一百畝十一月納備州田一千畝于東大
寺唐禪院薦上皇也十二月山階寺田一
千畝給施藥院也

廢帝 第四十七 諱大炊

元年春正月改元天平寶字夏四月秋八月
庚子天皇即位僧綱善提上尊号於太上皇
釋尊真賜号大和尚沙門延慶授朝散大夫

碎許之新羅沙門來冬十月

續日本紀第
二十三月天
皇履殿弟
慶之裏天
下太平四字
自生字
又云八月駿
河列益頭
郡人金利
舍人麻自
献蚕產
成字

天平寶字元年戊戌去歲八月駿州獻蚕
自成字曰皇帝命百年先三月宮中承塵
上有天下太平四字因茲十八改元今以
史法系元正八月初一帝受禪即位帝天
武之孫舍人親王第七子也即日善提僧
正率僧綱上表於太上皇号曰寶字孝謙
稱德皇帝此日授号于鑑真初為大僧正
真患綱務煩雜故有此授延慶法師有時

望授朝散大夫而賜封田慶辭爵封帝許
爵不許封君子曰君臣有禮乎癸卯新羅
沙門二十二入尼二人男十九人女二十
一人歸化救居武州閑地於是始置新羅
郡尋常受位年丕元曷爲元折衷也曷爲
折衷丁酉改元戊戌即位己亥立元恐緩
也戊戌之元者折衷也是咸當肅宗乾元
元年也

二年春夏才月城外路傍栽果樹修諸州廢

寺括私度秋八月大和尚鑑真建招提寺冬
寶字二年六月東大寺普照法師奏路傍
果樹可輔聖化行路之人多寓其下熱則
就蔭飢則啖實乞城外道兩邊栽果樹制
可山階寺玄基法師奏嚴淨國家無過伽
藍攘災拯難佛力賴之見今諸州練若廢
頽相仍不加修治恐失基趾乞降宣刺史
諸檀年加興復制可八月鑿真創招提寺
薦聖武帝也書号尊之也沙門賢瑒寫大

藏五千四十八卷而納寺又薦帝也君子
曰見義勇為環之謂乎

三年春二月僧正菩提寂復秋七月置四位
十三階賦東大寺產冬沙門良辨為僧正
實字三年七月四位十三階依良辨奏也
詔曰東大寺封五千戶其一千戶充修造
二千戶僧供二千戶官家法事非禮也
四年春二月太師藤仲移觀音殿于興福寺
夏六月造彌陀像于天下法華寺納田于山

階寺于法華寺秋冬十月遷都近州保良道
鏡侍上皇疾

實字四年二月藤惠美押勝修一字興福
寺安觀音像西壁繡補陀落山東壁極樂
界相精致妙麗此字元山階寺東院也太
師叛臣曷為書官褒修營也然則何名功
不全也六月庚辛皇太后期忌預攝淨土
院于法華寺西南隅安丈六彌陀像至此
日設齋供天下國分尼寺皆洽又納田四

不族

百畝于山階寺每國忌講梵網戒經法華
寺田給淨上院薦太后藤氏也十月之遷
都十三也沙門道鏡姓弓削氏義淵之徒
也有梵學召入內道場修如意輪觀自在
供上皇疾保良詔鏡看侍鏡曷為不族譏
也曷為譏侍女主也

五年春正月築戒壇于藥師寺于觀世音寺
復五月辛丑復都平城六月太上皇祝髮秋
冬

寶字五年正月二十一敕曰東山道下野
藥師寺西海道築紫觀世音寺各立戒壇
充東西戒業也上皇與帝有隙因茲五月
帝歸平城在中宮院上皇于法華寺六月
上皇為尼法諱法基
六年春復五月戊申大和尚鑑真寂秋冬納
封戶于葛木寺

寶字字年

七年春夏秋九月道鏡号大臣禪師停畋獵

冬十月壬申天皇狩淡州十有一月檢保國分寺

寶字七年九月道鏡賜大臣号禪師鏡媚上皇故書不旋号名非法不書賜寶字之政權在上皇帝只當宁而已藤太師患鏡之寵及反以誅鏡為名壬子仲亡上皇聞帝知仲事遣兵圍中宮院帝懼退位降為淡路公配淡州婉文書狩也十一月詔曰比聞諸國分寺郡史侵掠多致朽荒僧尼

逃散大壞風化諸州刺史宜加檢察

元亨釋書卷第二十二





Handwritten text on the spine, oriented vertically and partially obscured by the binding. The visible characters include "90" and "18" in a cursive script.

